

Promé invershon di PCN na St. Eustatius a bira un realidat

Kralendijk- E fondo di penshun Hulandes Caribense (PCN) lo hasi un fiansa na Old Gin House Exploitatie Maatschappij B.V. (OGHEM B.V.), pa fiansiá kompra di e apartamentonan ku ta konisí lokalmente komo Talk of the Town.

Direktiva di PCN den 2018 a kuminsá identifiká vários posibilidat pa hasi invershon na Boneiru, St. Eustatius i Saba. E fiansa na OGHEM ta e promé invershon konkreto na St. Eustatius, pero segun presidente di PCN, Harald Linkels, sigur no e último.

"Nos ta studiando diferente proyekto interesante na Sint Eustatius. De e simannan benidero nos lo tin mas notisia tokante invershon na St. Eustatius" segun Linkels. Promé ku e invershon na St. Eustatius, PCN ya a duna un fiansa na e kompania di aviashon EZ Air, miéntras ku e fondo di penshun tambe ta forma parti di un konsorsio finansiero ku ta bai fiansiá konstrukshon di 500 kas di pueblo na Boneiru.

E preparashonnan pa por yega na e fiansa pa OGHEM a tuma algun luna, den kual a studia e sifranan di e kompania i tambe detaye di e kontrakt tokante e kondishonnan. Den e proseso aki, PCN a risibí ayudo di e conseheronan di Curaçao Financial Group (CFG), ku resientemente a wòrdu nombrá dor di e fondo komo e entidat ku lo manehá e invershonnan lokal di PCN.

Direktor di OGHEM B.V, Sybolt ten Hoopen ta bisa ku e ta hopi kontentu ku e finansiamentu, pasombra esaki lo kondusí na mas kapisidat di akomodashon na St. Eustatius. Segun Ten Hoopen esaki ta nesesario, si ta wak tur e proyektonan ku ta tumando lugá na e isla aktualmente.

Ten Hoopen i su kasá Marlies ta responsabel tambe pa e eksplotashon di Old Gin House Hotel & Restaurant, un hotel monumental i di renombre na St. Eustatius. "Nos operashon tabata inkluí e apartamentunan di Talk of the Town pa algun tempu kaba, dor ku nos a hür esakinan di e doño anterior, Norako N.V. Nos ta hopi kontentu ku awor nos por kumpra e apartamentunan aki, ku ayudo di PCN. Ku e kompra aki, nos ta sigurá ku nos por sigui manehá e kompleho aki riba término largu", segun Marlies ten Hoopen.

E pareha invershonista ta bisa ku nan tin e mira di por ofresé akomodashon pa hinter e spektro di e merkado, ámbos pa loke ta traha hende ku ta keda un par di dia so, te na esnan ku ta bin keda pa un tempu mas largu. Segun e pareha, Talk of The Town ta pas perfektamente den nan plannan. Nan ta mustra nan mes optimista pa ku e temporada haltu di turismo na aña 2020 i e añanan ku ta sigui.

"E trayekto ku nos a kana den e lunanan pasá ku PCN i nan conseheronan, tabata interesante i unu di kual nos a siña hopi tambe. Si tur kos ta kana manera nos ta pensa i spera, nos ta bai drenta un époka hopi interesante pa nos komo kompania. Nos a establese nos mes na Statia pa e término largu", asina Sybolt ten Hoopen a bisa.

